

Gaej Deng Biuciem Laiqcaemq



别被标签绑架

□ Lanz Feihgez



Lij iq miz geij baez gauj yinghyij mbouj ndei, bohmei mwngz roxnaeuz lauxsae mwngz dwg mbouj dwg naeuz mwngz hag mbouj ndei yinghyij? Mwngz dwg mbouj dwg caeuq gyoengqde siengj doxdoengz, nyinhnaeuz swheij caen hag mbouj ndei yinghyij dahraix, doeklaeng couh mbouj nyinhcaen hwnj dangz yinghyij lo?

Lauheiq mwngz cijdwg fouzeiq gangj geij coenz vahriu, gij vunz hen ndang dwg mbouj dwg naeuz mwngz gangj vah gig mizyinx? Mwngz dwg mbouj dwg hix doengzeiq gij vah gyoengqde, baezlaeng moix baez caeuq vunz gangjgoj, cungj daengdaengq bae ra gij vah ndeiri dauj gangj, hoeng mizseiz mbouj haeujsim gangj loek lo?

“Hag mbouj ndei yinghyij” hix ndei, “gangjah ndeiri hix ndaej”, gij biuciem bouxwnq hawj raeuz nem hwnj neix, yawj hwnjdaeu lumj gig rox raeuz, hoeng saek seiz dauqfanj dwg miz vunz gik bae siengj couh hawj bingzgyaq. Engq youqgaenj dwg danghnaeuz raeuz hix nyinhnaeuz gij biuciem bouxwnq seizbien nem hawj deng, daengdaengq bae bauj gij biuciem ndei maenh, roxnaeuz doengzeiq gij biuciem rwix caemhcaiq doiq de mbouj leix mbouj langh, lauheiq gig mbouj leih raeuz hungmaj.

Hwnj cuhcungh seiz, gij cingzcik yinghyij gou itcig baiz youq daengx nienzgaep baihnaj, gij cingzcik suyoze yaez ndaej mbouj baenz gangj. Mboujlwnh bohmei roxnaeuz banhcujiy, cungj naeuz daeglwg neix

yinghyij baenzneix ndei, hab bae doeg vwnzgoh, doeg lijgoh mbouj habcik. Youq gij biuciem yingyangj baihlaj, gou hix baenzneix nyinhnaeuz, ndigah couh mbouj yungh geijlai goengfou bae hag suyoze, vuzlij caeuq vayoz lo, fanjcingq swheij hix hag mbouj ndei.

Daengz gauhcungh, aenvih haeuj ban ndei, doengzhag cungj dwg youh gaenx youh maenh. Youq gizneix, gij yinghyij gou beij mbouj gvaq bouxwnq, gij suyoze ca ndaej mbouj rox baenzlawz yawj. Gou fatmoengx lo, suyoze yaez mbouj yungh dwen, baenzlawz yinghyij hix bienq ndaej bingzciengz lo. Nanzdauh gou mbouj hab doeg vwnzgoh? Baenzneix gou lij doeg maz saw dem? Sauh nanz he gou cungj mbouj nyienh bae siengj gij vwndiz neix, aeu gij seizgan ceiq ndei hagsib bae ndaw vangbah dwk youzhi. Hoeng, hwnj gauhcungh ngeih nienzgaep le, gou baez ndaejhoengq couh bae geiq gij danhsuz yinghyij, roengzrengz bae gaghag suyoze, doeklaeng gij cingzcik suyoze caeuq yinghyij mauhgvaq haujai doengzhag, baiz daengz baihnaj lo.

Bonj saw 《Gij Fap Hagsib》 ndawde, dwen daengz song cungj swheiz, heuhguh “cingjdaej lijln” caeuq “cugciemh lijln”. Danghnaeuz gij vunz miz “cingjdaej lijln” nyinhnaeuz swheij youq giz he gig miz dungxcaiz, caemhcaiq saenq gij cingzcik dwg aenvih miz gij dungxcaiz, gij dungxcaiz neix nanz ndaej bienq, dwg aen “cingjdaej”. Gij vunz miz “cugciemh lijln” nyinhnaeuz gij cingzcik dwg baengh

swheij roengzrengz mbouj daengx, caemhcaiq saenq cijaeu swheij menhmenh baenaj couh rox guh ndaej engq ndei. Danghnaeuz bungz diuhcan, boux “cingjdaej lijln” yungzheih simgip simvueng, boux miz “cugciemh lijln” lauheiq engq miz saenqsim.

Doiq boux “cingjdaej lijln” dauj gangj, gyoengqde doiq gij bingzgyaq swheij couhdwg gij “biuciem” bouxwnq fouzeiq mizeiq nem hwnjbae. Doeg cuhcungh seiz, gou doengzeiq gij biuciem bohmei caeuq lauxsae nem hawj, yungh gij “cingjdaej lijln” mozik, nyinhnaeuz swheij daj okseng miz dungxcaiz hag yinghyij caemhcaiq fouz gij dungxcaiz hag suyoze, ndigah roengzrengz bae hag hix mbouj miz yungh, baenzneix gij “biuciem” bouxwnq nem menhmenh bienqbaenz gou gik bae hagsib. Caj gou hwnj gauhcungh, doengzhag gaenx hag, miz dungxcaiz gaenbonj couh gangj mbouj doeng, gou youh caeuq gyoengqvunz “cingjdaej lijln” doxdoengz, hainduj ndojdeuz, mbouj nyienh bae najdoi yienhsaed. Gyo-ndaej gou gvaq yaep he couh rox bae roengzrengz, fouzeiq baenz boux “cugciemh lijln”, doeklaeng hix baengh haengrengz ndaej gij cingzcik ndei.

Mboujgvaq, gij vah gou aeu gangj gawq mbouj dwg roengzrengz caeuq dungxcaiz aen lawz engq youqgaenj, hix mbouj dwg roengzrengz le couh ndaej dawz lwgmak ndei. Gou siengj gangj gij “biuciem” nem hawj raeuz. Gij “biuciem” ndei dangyienz dwg cungj haengjdingh, hoeng danghnaeuz

raeuz angqfwngfwng yiengsauh ndwi, lij daengdaengq bae ra gihvei cwngmingz gij “biuciem”, baenzneix raeuz couh deng gij “biuciem” laiqaemq lo. Mbouj dwg buekmingh bae veizciz gij yienghsienq “biuciem” hawj, couhdwg deng gij “biuciem” hoenxbaih. Danghnaeuz raeuz doengzeiq gij “biuciem” rwix, raeuz couh nanz ndaej hungmaj, najdoi gij saetbaih engq yungzheih mbouj saenq swheij, ngoenz doek ngoenz doeknaiq roengzbae.

Gou miz haujai doengzhag cingzcik itbuen, gyoengqde gig hozhaenz gij doengzhag cingzcik ndei, nyinhnaeuz gij doengzhag cingzcik ndei gig coengmingz, mbouj aeu roengzrengz geijlai couh gauj ndaej ndei. Gwq yiemz bohmei hawj uk huk, swheij roengzrengz le cingzcik hix mbouj ndaej daezsang, yied mbouj saenq swheij, yied mbouj nyienh bae hagsib. Youq gwnzbiengz, siuj mbouj ndaej miz vunz aeu “coengmingz daj okseng miz” bae lwnh vunz, itdingh aeu haeujsim bouxwnq diep “biuciem” hawj raeuz, engq aeu haeujsim gag diep “biuciem” hwnj ndang.

Youq gij “biuciem” maenh lajde, raeuz cungj wnggai cingsingj roxnyinh: Swheij rox mboujduenh hungmaj, couhcinj dwg “diencaiz”, hix aeu ok hanh. Raeuz aeu geiq maenh gaenx ndaej bouj huk. Bouxhingz mboujlwnh baenzgoeng roxnaeuz saetbaih, cungj gamj mbek gij “biuciem” roengzdaeu, mboujduenh roengzrengz caeuq dauqngex, baenaj guh engq ndei.

(Veiz Funlingz hoiz)

Bouxlongj “Hai Sengx”

砬人“开厢”

□ Vangz Gozgvanh / 黄国观

Bouxlongj miz gij vwnzva caeq daegbied, ndawde “hai sengx” gig mizyinx, riuz miz cien bi lo.

“Sengx” dwg gij faexgyaengh gven cukseng, gij faexgyaengh vang dauj gven heuhguh lanz, daengj couh heuhguh sengx, Bouxlongj aeu sengx dauj gven dou lai. Aenvih guh caeq neix aeu hai sengx, ndigah couh heuhguh “hai sengx”.

Miz caezgya “hai sengx” caeuq ranz dog “hai sengx” song cungj. Caezgya “hai sengx” moix bi ndwencieng coit daengz cibhaj youq miuhcwz guh, ranz dog “hai sengx”

moix bi bi rieng song sam ngoenz youq ndaw ranz gag guh. Aenvih bi he gvaq, gyoengqvunz roxnyinh lainoix daiq miz gij oemjsoemq haeuj ranz hwnj ndang, vih swiq gij oemjsoemq neix, gyoengqvunz couh aeu “hai sengx” lo.

“Hai sengx” seiz aeu bouxdauh cingj daegsien oiq gwnzmbwn baihdoeng, baihsae, baihnanz caeuq baihbaek roengzdaeu, caiq soen gij raemx sien, baenzneix muengh ndaej swiq oemjsoemq cawz uq, hawj vunz seuqcingh, ndang mbaeu haeuj bi moq.



Ndaw naz gomiuz maj ndaej heuswd hoengghwd.

Suz Gin ingj